



Broj: 01-592/25

Sarajevo: 10. 11. 2025. godine

PREDSTAVNIČKI DOM

PARLAMENTARNE SKUPŠTINE BOSNE I HERCEGOVINE

n/r predsjedavajućeg

Šemsudin Mehmedović



BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

|                        |                       |            |              |
|------------------------|-----------------------|------------|--------------|
| PRIMLJENO: 11-11-2025  |                       |            |              |
| Organizaciona jedinica | Klasifikaciona oznaka | Redni broj | Broj priloga |
|                        |                       |            |              |

01,02 - 50-11-19-1/24

**Predmet:** Pitanje za predsjedavajuću Vijeća ministara Bosne i Hercegovine  
za 1. posebnu sjednicu oba doma Parlamentarne skupštine Bosne i Hercegovine

Poštovani,

U skladu s članom 172. stav (3) Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 53/22, 59/23, 87/23, 50/24, 73/24) i 56/25, postavljam pitanje Borjani Krišto, predsjedavajućoj Vijeća ministara Bosne i Hercegovine, u okviru 1. posebne sjednice oba doma Parlamentarne skupštine Bosne i Hercegovine, koja je zakazana za 27. 11. 2025. godine.

Pitanjeglasi:

„Budući da rukovodeći državni službenici Robert Vidović, generalni sekretar Vijeća ministara Bosne i Hercegovine i Josip Merdžo, direktor Instituta za intelektualno vlasništvo Bosne i Hercegovine, u javnosti istupaju kao dužnosnici političke stranke HDZ BiH i učestvuju u radu organa HDZ-a BiH, čime grube krše član 16. Zakona o državnoj službi u institucijama Bosne i Hercegovine, kao i zbog činjenice da grubo krše član 7. Zakona o upravi na način da je Robert Vidović omogućio da je u Generalnom sekretarijatu Vijeća ministara zaposleno 100% više Hrvata od zakonom utvrđenog broja, a broj Bošnjaka sveo na svega jednu trećinu, dok je Josip Merdžo omogućio da je, protivno zakonu, u Institutu za intelektualno vlasništvo zaposleno 174% više Hrvata od zakonom utvrđenog broja, a zaposlenih Bošnjaka je samo jedna petina, **predsjedavajućoj Vijeća ministara postavljam sljedeće pitanje: 'Da li, s obzirom na sve navedeno, smatra da se na Roberta Vidovića i Josipa Merdžu ne odnose zakoni Bosne i Hercegovine samo zato što su dužnosnici HDZ-a i njeni dugogodišnji najbliži saradnici?'** Javnosti je poznato da najviši rukovodioci HDZ-a često ističu da su oni promicatelji evropskih vrijednost, dok istovremeno ne poštuju osnovno načelo **demokratije i Evropske unije**, a to je vladavina prava.“

U prilogu dostavljam dokaze o stranačkim aktivnostima Roberta Vidovića i Josipa Merdže.

S poštovanjem,

ZASTUPNIK PS BiH  
Šemsudin Mehmedović

**KAKO SU OPRAVDALI ODSUSTVO S POSLA**

# **Na skupu HDZ-a u Neumu stotine stranačkih dužnosnika: Među njima i državni službenici Robert Vidović i Josip Merdžo**

**Patria**

Autor članka 5.10.2025 - 08:19

Pridružite se

*Vidović se vidi između Krišto i Čovića (Foto: HDZ BiH)*

(Patria) - U petak 3. oktobra u Neumu je održana Klauzura Hrvatske demokratske zajednice BiH kojoj su prisustvovala stotine stranačkih dužnosnika.

"Klauzura je kroz tri panel-rasprave, koje su obradile sve istaknute unutarnje i vanjskopolitičke teme, okupila nekoliko stotina stranačkih dužnosnika sa svih razina vlasti u BiH", naveli su iz HDZ BiH.

S obzirom da se na fotografijama vide mnogobrojni nosioci javnih funkcija, izabrani i imenovani zvaničnici, postavlja se pitanje kako su pravdali svoje odsustvo sa redovnih aktivnosti i radnog mjesta, a posebno rukovodeći državni službenici.

Tako su naprimjer Klauzuri prisustvovali generalni sekretar Vijeća ministara BiH Robert Vidović i direktor Instituta za intelektualno vlasništvo BiH Josip Merdžo koji je i generalni sekretar HNS-a. Na posljednoj sjednici Doma naroda PS BiH problematizirana je politička uloga Josipa Merdže s obzirom da je rukovodeći državni službenik, a redovno se pojavljuje na stranačkim aktivnostima.

Zakon o državnoj službi u institucijama BiH u članu 16. navodi da državni službenik ne smije obavljati dužnost, aktivnost ili biti na položaju koji dovodi do sukoba interesa sa njegovim službenim dužnostima, a naročito da državni službenik ne može biti član upravnih i drugih odbora političkih stranaka i ne smije slijediti instrukcije političkih stranaka. Državni službenik je dužan da prilikom postavljanja na mjesto državnog službenika predoči sve informacije o djelatnostima i funkcijama koje obavlja.

Merdžo redovno učestvuje u političkim aktivnostima HDZ-a i HNS-a, drži obuke na političkim akademijama HDZ-a, a sve to dok prima visoku plaću iz državnog budžeta. Od 2016. godine je na čelu Instituta za intelektualno vlasništvo BiH, a novi mandat dobio je 2023. godine.

Na ovom stranačkom skupu Merdžo je održao tematsko predavanje „Pokušaji unitarizacije kroz sudski aktivizam“. Predavanje „Slučaj Kovačević“ vodio je ministar pravde BiH Davor Bunoza.

I Vidovićevo prisustvo Klauzuri je sporno jer njegova funkcija generalnog sekretara Vijeća ministara BiH predstavlja najvišu profesionalnu poziciju

državnog službenika u zemlji, odmah ispod politički imenovanih ministara.

Osoba na toj dužnosti vodi Generalni sekretarijat, ključnu operativnu jedinicu koja koordinira rad Vijeća ministara, priprema sjednice i upravlja administrativnim protokolima. Od generalnog sekretara se očekuje visok nivo stručnog, etičkog i akademskog integriteta, budući da ima pristup najvažnijim procesima državne izvršne vlasti. No, očito je da Vidovič uživa veliku protekciju unutar HDZ-a pa je za nekoliko godina promijenio više pozicija unutar institucija BiH, dok nije imenovan za generalnog sekretara Vijeća ministara BiH.

"Klauzura HDZ-a BiH u Neumu okupila je stotine dužnosnika sa svih razina vlasti, potvrđujući snažno opredjeljenje stranke za daljnje predvođenje europskog puta Bosne i Hercegovine. Sudionici su istaknuli ključna postignuća ostvarenja prava hrvatskoga naroda, značaj legitimne zastupljenosti u vlasti te potrebu nastavka dosljednog političkog djelovanja u funkciji stabilnosti, ravnopravnosti i prosperiteta zemlje. Održane rasprave i paneli dodatno su potvrdili kako HDZ BiH ostaje ključni nositelj političke vizije hrvatskoga naroda i pouzdan partner u jačanju europskih standarda i integracija u Bosni i Hercegovini", navodi se u saopćenju HDZ-a.



**Dragan Čović**

@Dragan\_Covic

Presude iz Strasbourga - zaštita ljudskih prava ili revizija Dayton a tema je 1. Panela. S osvrtnom na presude ESLJP i Ustavnog suda BiH te pokušaje unitarizacije kroz sudski aktivizam, danas govorimo o obrani #BiH te zaštiti Dayton a, načela konstitutivnosti i ustavnih prava Hrvata.



IROKI BRIJEG

# **Koordinacija dužnosnika HDZ-a BiH: Poštivanje prava konstitutivnih naroda preduvjet za dugoročnu stabilnost i europski put Bosne i Hercegovine**

PIŠE: DESK

/

29.10.2025. u 19:35

Danas je u Širokom Brijegu održana koordinacija Hrvatske demokratske zajednice Bosne i Hercegovine s dužnosnicima zakonodavne i izvršne vlasti na razini BiH, s ciljem usklađivanja prioriteta na unutarnjem i vanjskopolitičkom planu.

Tijekom sastanka razmatrane su aktualnosti vezane uz predstojeće reforme i funkcioniranje institucija na razini BiH, s naglaskom na usklađivanje prioriteta i aktivnosti važnih za europski put zemlje i legitimno političko predstavljanje hrvatskoga naroda. Također je posvećena posebna pažnja pitanjima sigurnosti, pravosuđa, vanjskih poslova, obrane, civilnih poslova te gospodarskim i vanjskotrgovinskim projektima od važnosti za hrvatski narod i BiH u cijelosti, prenosi RTV HB.

Ovom prilikom je istaknuto kako institucionalna stabilnost i dosljedno poštivanje prava konstitutivnih naroda predstavljaju preduvjet za dugoročnu stabilnost i europski put Bosne i Hercegovine. U svjetlu predstojeće 30. obljetnice Daytonskog mirovnog sporazuma, naglašena je važnost očuvanja mira i ustavnog poretka te potreba izmjene izbornog zakonodavstva radi ostvarivanja legitimnog političkog predstavljanja konstitutivnih naroda i nastavka političkog dijaloga o europskim reformama.

Zaključeno je kako će se koordinacijske aktivnosti nastaviti u predviđenom kontinuitetu, s naglaskom na zajedničko strateško djelovanje u pitanjima od nacionalnog značaja, predanost europskoj budućnosti Bosne i Hercegovine, ravnopravnosti triju konstitutivnih naroda i institucionalnoj stabilnosti BiH.

Koordinaciji su nazočili dopredsjedatelj Doma naroda Parlamentarne skupštine BiH dr. Dragan Čović, predsjedateljica Vijeća ministara BiH Borjana Krišto, zastupnici u Zastupničkom domu Parlamentarne skupštine BiH Darijana Filipović i Predrag Kožul, izaslanik u Domu naroda

Parlamentarne skupštine BiH Zdenko Čosić, ministar pravde BiH Davor Bunoza, zamjenik ministra vanjskih poslova BiH Josip Brkić, zamjenik ministra obrane BiH Slaven Galić, zamjenik ministra sigurnosti BiH Ivica Bošnjak te zamjenica ministra vanjske trgovine BiH Ljiljana Lovrić, generalni tajnik Vijeća ministara BiH Robert Vidović te tajnik Zastupničkog doma PS BiH Dražen Mustapić.

Dnevnik.ba